



**Prijedlog**

Na osnovu člana 4. stav 2. i člana 13. stav 4. Zakona o cestama Federacije BiH ("Službene novine Federacije Bosne i Hercegovine", broj: 12/10, 16/10 i 66/13) i člana 24. Statuta općine Gradačac („Službeni glasnik općine Gradačac“, broj: 4/08, 5/12 i 1/17), Općinsko vijeće općine Gradačac, na \_\_\_\_\_ sjednici održanoj dana \_\_\_\_\_ 2017.godine, d o n o s i

**O D L U K U**

**o lokalnim i nerazvrstanim cestama  
i ulicama na području općine Gradačac**

**I - OPĆE ODREDBE**

**Član 1.**

Ovom odlukom uređuje se upravljanje, građenje, rekonstrukcija, održavanje, zaštita, nadzor i finansiranje lokalnih i nerazvrstanih cesta i ulica na području općine Gradačac, koje imaju status javne ceste ili ceste u posjedu/vlasništvu općine Gradačac ( u daljem tekstu: ceste).

**Član 2.**

Cesta je svaka površina na kojoj se odvija saobraćaj.

Cestu u smislu ove Odluke čine:

- cestovna građevina,
- cestovni pojas sa obje strane ceste potreban za nesmetano održavanje širine prema projektu ceste, a najmanje jedan metar računajući od crte koja spaja krajnje tačke poprečnog profila ceste,
- cestovno zemljište koje čini površina zemljišta na kojoj prema projektu treba izgraditi ili je izgrađena cestovna građevina, površina cestovnog pojasa, te površina zemljišta na kojima su, prema projektu ceste, izgrađene ili se trebaju izgraditi građevine za potrebe održavanja ceste i pružanje usluga vozačima i putnicima, te naplatu putarine,
- građevine na cestovnom zemljištu za potrebe održavanja ceste,
- stabilni mjerni objekti i uređaji za nadzor vozila,
- priključci na javnu cestu izgrađeni na cestovnom zemljištu,
- saobraćajni znakovi i oprema ceste,
- građevine i oprema za zaštitu ceste, saobraćaja i okoliša.

Zaštitni cestovni pojas je pojas na kojem važi poseban režim gradnje i uspostavlja se s ciljem zaštite javne ceste i sigurnosti saobraćaja na njoj od štetnih uticaja i različitih aktivnosti u prostoru pored javne ceste.

Kolovoz ulica u naseljima i gradovima kroz koje prolaze javne ceste smatraju se dijelovima tih cesta.

Javne staze su saobraćajnice namijenjene za povezivanje naselja ili dijelova naselja u okviru općine, a ne ispunjavaju propisane kriterije za lokalne ceste, ili su predviđene samo za određenu vrstu učesnika u saobraćaju (ceste i staze u stambenim zonama, seoske ceste i staze, pješačke staze, biciklističke staze, konjske staze i slično).

### **Član 3.**

Lokalne i nerazvrstane ceste i ulice na području općine Gradačac su u nadležnosti općine Gradačac.

Sve ceste iz člana 1. ove Odluke sa pripadajućim zemljištem su javna dobra.

### **Član 4.**

Obezbjedenje materijalnih i drugih uslova za održavanje, zaštitu i upravljanje cestama iz prethodnog člana ove Odluke vrši općina Gradačac putem svojih nadležnih organa i službi.

### **Član 5.**

Lokalne ceste povezuju naselja u općini sa naseljima iz susjednih općina, ili povezuju važnija naselja unutar općine, te povezuju saobraćaj na druge javne ceste iste ili više kategorije.

Odlukom o kategorizaciji lokalnih cesta i ulica u gradu Tuzla i općinama Tuzlanskog kantona (Službene novine Tuzlanskog kantona br. 14/14) taksativno su navedene lokalne ceste na području općine Gradačac.

### **Član 6.**

Nerazvrstana cesta je površina koja se koristi za saobraćaj po bilo kojoj osnovi ( poljski i šumski put, zatim put na nasipima za odbranu od poplava, prilazni put do svih novoformiranih građevinskih parcela, sokaci i slično) i koja je pristupačna većem broju korisnika (dva ili više lica) .

U skladu sa odredbama zakona koji regulišu oblast uređenja prostora i građenja, ovom Odlukom se propisuje način i uslovi priključenja na javni put, odnosno definiše se status odcijepljenog prilaznog puta iz stava 1. ovog člana do novoformiranih građevinskih parcela.

Shodno navedenom u prethodnom stavu, vlasnici nekretnina koji traže od službe nadležne za urbanizam i prostorno uređenje prijedlog cijepanja parcele u svrhu formiranja većeg broja manjih građevinskih parcela, obavezuju se da odvoje dio zemljišta za pristupnu cestu tim parcelama i isto prevedu u vlasništvo Općine bez naknade, pri čemu troškove uknjižbe snosi Općina.

U situacijama iz prethodnog stava, općinska služba nadležna za urbanizam i prostorno uređenje izdaje posebno Rješenje sa prijedlogom cijepanja, u kojem se decidno navodi da je za ovakav vid parcelisanja građevinskog zemljišta, imperativan uslov formiranje te ceste, na prednje opisan način.

Primjerak takvog Rješenja se službeno dostavlja na znanje općinskoj službi nadležnoj za geodetske i imovinsko-pravne poslove.

Služba iz prethodnog stava ne može provesti u katastarskom operatu prijedlog cijepanja suprotno odredbi iz stavova 3. i 4. ovog člana.

Za nerazvrstane ceste iz stava 1. ovog člana, Služba nadležna za komunalne poslove vodi poseban registar.

### **Član 7.**

Ulica je dio ceste u naseljenom mjestu, s trotoarom i ivičnjakom, pored koje se najmanje s jedne strane nalaze redovi kuća ili grupe zgrada.

## **II UPRAVLJANJE**

### **Član 8.**

Cestama upravlja Općinska služba nadležna za komunalne poslove (u daljem tekstu upravitelj), na načina da:

1. Sprovodi utvrđenu politiku finansiranja shodno aktima iz tačke 1.,
2. Stara se o obezbjeđenju potrebnih sredstava za realizaciju planova i programa,
3. Stara se o realizaciji mjera i aktivnosti na unapređenju bezbjednosti saobraćaja na nerazvrstanim cestama,
4. Organizuje tehničko i finansijsko sprovođenje plana i programa, te kontrolu istih,
5. Organizuje poslove projektovanja, izgradnje, rekonstrukcije i održavanja,
6. Organizuje i vodi evidenciju cesta i ulica u nadležnosti općine Gradačac, sa svim saobraćajnim i građevinskim karakteristikama, te finansijskim pokazateljima za svaku cestu.
7. Daje saglasnosti na izvođenju radova u pojasu cesta i ulica.
8. Privremeno zabranjuje ili ograničava promet na cesti ili samo na pojedinim dijelovima, zavisno od stanja ceste, izvođenja radova i mogućnosti obavljanja prometa.
9. Izdaje saglasnost kojom će se propisati načini i uslovi uređenja kanala u cestovnom pojasu,
10. Izdaje dozvolu za vanredni prijevoz,
11. Izdaje saglasnosti za prekopavanje ili bušenje trupa ceste,
12. Izdaje načelnu saglasnost za izmjenjeni režim saobraćaja,
13. Izdaje saglasnost za postavljanje natpisa/obavijesti pored javnih cesta,
14. Izdaje saglasnost za postavljanje objekata u zaštitinom pojasu javne ceste.

### **III IZGRADNJA I REKONSTRUKCIJA**

#### **Član 9.**

Pod izgradnjom cesta smatra se izgradnja cesta pretežno po novoj trasi.

Pod rekonstrukcijom cesta smatraju se radovi na dijelu postojeće ceste kojim se mijenja njena osnovna karakteristika sa ciljem povećanja kapaciteta ceste i nivoa usluga.

Sanacija (rehabilitacija) cesta podrazumijeva izvođenje radova na cesti kojima se poboljšava sigurnost ucesnika u saobraćaju i održavanje projektovanog stanja cesta.

#### **Član 10.**

Izgradnja novih i rekonstrukcija postojećih nerazvrstanih cesta vrši se na osnovu odobrenja za građenje od nadležnog organa, shodno odredbama Zakona o prostornom uređenju i građenju TK.

#### **Član 11.**

Kod izgradnje novih i rekonstrukcije postojećih ulica potrebno je predvidjeti obavezno trotoar minimalne širine 1,2 metar, u izuzetnim situacijama ne ispod 0,8 metara.

Lokalne ceste i ulice moraju biti osposobljene da podnesu osovinsko opterećenje od najmanje 6 tona, dok nerazvrstane ceste moraju biti osposobljene da podnesu osovinsko opterećenje od najmanje 4 tone.

Pravno ili fizičko lice koje izvodi radove na javnoj cesti, prije početka radova, dužno je osigurati mjesto na kome se radovi izvode, kao i za vrijeme trajanja radova organizirati siguran saobraćaj na mjestu izvođenja radova.

#### **Član 12.**

U slučaju rekonstrukcije cesta i vršenja radova investicijskog održavanja javnih cesta koji iziskuju premještanje postojećih instalacija u cestovnom pojasu, vlasnici instalacija na cesti dužni su, o svom trošku, izmjestiti te instalacije, odnosno prilagoditi ih nastalim promjenama, ako aktom o davanju saglasnosti za postavljanje tih instalacija ili ugovorom između vlasnika instalacija i onoga ko upravlja cestom nije drugačije uređeno.

Investitor radova na rekonstrukciji cesta i vršenja radova investicijskog održavanja javnih cesta dužan je najmanje tri mjeseca ranije obavijestiti vlasnika instalacija o početku radova na rekonstrukciji cesta i omogućiti im uvid u tehničku dokumentaciju, ali nije dužan pribavljati saglasnosti vlasnika instalacija koje su u cestovnom pojasu.

U slučaju da vlasnik instalacija u trupu ceste i u cestovnom pojasu ne izmjesti svoje instalacije iz stava 1. ovog člana i ne prilagodi ih nastalim promjenama do početka radova na rekonstrukciji ceste, investitor radova će izvršiti premještanje, odnosno prilagodavanja na teret vlasnika instalacija.

#### **IV ODRŽAVANJE**

##### **Član 13.**

Održavanje cesta, u smislu ove Odluke, obuhvata izvođenje radova kojima se osigurava nesmetan i siguran saobraćaj i očuvanje projektovanog stanja ceste.

Radovi na održavanju cesta mogu biti redovni i vanredni.  
Redovno održavanje može biti ljetno i zimsko.

##### **Član 14.**

Radovi redovnog održavanja su:

- popravka kolovoza, trupa ceste, potpornih i obloženih zidova,
- uklanjanje odronjenog materijala i čišćenje kolovoza i objekata za odvodnju,
- održavanje bankina, nasipa, usjeka i zasjeka,
- održavanje objekata na cestama,
- izgradnja i postavljanje horizontalne i vertikalne signalizacije, svjetlosno- sigurnosnih uređaja, zamjena, popravka i uklanjanje oštećene i nepotrebne saobraćajne signalizacije i opreme ceste,
- košenje trave i održavanje zelenih površina i zasada u cestovnom pojasu,
- održavanje potrebne preglednosti cesta i oznaka u cestovnom pojasu,
- čišćenje snijega i leda sa kolovoza i posipanje kolnika s ciljem sprečavanja poledice,
- manji zahvati na obnavljanju, zamjeni i ojačanju dotrajalih kolovoza,
- manji zahvati na ojačanju i zamjeni propusta, potpornih i obloženih zidova i zaštita čeličnih konstrukcija od korozije,
- manji zahvati na ugrađivanju ivičnjaka i izradi pješačkih staza,
- manji zahvati na saniranju klizišta i odrona,
- vođenje podataka o javnim cestama, obavljanje i drugih poslova kojima se osigurava stalan, nesmetan i siguran saobraćaj na cestama.

##### **Član 15.**

Radovi vanrednog održavanja javnih cesta su obimniji i isti obuhvataju:

- obnavljanje, zamjenu i ojačanje dotrajalih kolovoza,
- ojačanje i zamjenu propusta i mostova dužine do deset metara, obnovu potpornih i obloženih zidova i zaštitu čeličnih konstrukcija od korozije,
- ugrađivanje ivičnjaka i izradu pješačkih staza,
- saniranje klizišta i odrona.

Radovi vanrednog održavanja su radovi koji se izvode u cestovnom pojasu, mogu se izvoditi samo na osnovu tehničke dokumentacije.

##### **Član 16.**

Poslovi održavanja javnih cesta u smislu ove Odluke su i:

- planiranje održavanja i mjere zaštite javnih cesta i saobraćaja na njima,
- ustupanje radova redovnog i vanrednog održavanja javnih cesta,
- stručni nadzor i kontrola kvaliteta ugrađenih materijala i izvedenih radova održavanja javnih cesta,
- osiguranje uklanjanja oštećenih i napuštenih vozila i drugih stvari i predmeta sa javne ceste,
- ophodnja (obilaženje, izviđanje, patrola) cesta.

##### **Član 17.**

Radovi na održavanju javnih cesta trebaju se izvoditi tako da se zbog njih ne obustavlja saobraćaj.

### **Član 18.**

Ukoliko se mora obustaviti saobraćaj na cesti, Općinska služba nadležna za komunalne poslove izdaje načelnu saglasnost, koja prethodi rješenju o obustavi saobraćaja PU Gradačac.

Rješenjem PU Gradačac će se detaljno odrediti period obustavljanja saobraćaja, kao i alternativni pravac kretanja vozila.

### **Član 19.**

U slučaju prekida ili ugrožavanja saobraćaja na javnoj cesti zbog nanosa, odrona ili klizanja terena, kao i u slučaju oštećenja kolovoza koja u većoj mjeri ugrožavaju sigurnost saobraćaja, nadležna Služba za komunalne poslove koja upravlja cestama, odmah po saznanju, mora preduzeti mjere na otklanjanju smetnji i uspostavljanju sigurnog saobraćaja.

### **Član 20.**

U slučaju obustave saobraćaja upravitelj ceste dužan je obavijestiti korisnike ceste putem sredstava javnog informisanja o obustavi saobraćaja i to u roku od najmanje 48 sati prije početka obustave saobraćaja.

### **Član 21.**

Upravitelj ceste direktno ne izvodi radove gradnje, rekonstrukcije i održavanja javnih cesta.

Izvođenje radova gradnje, rekonstrukcije i održavanja javnih cesta upravitelj cesta ustupa pravnom licu po postupku i na način utvrđen Zakonom o javnim nabavkama.

### **Član 22.**

Izvođenje radova na izgradnji, rekonstrukciji i održavanju javnih cesta smije se ustupiti samo izvođaču koji je registriran, specijaliziran i opremljen za te poslove i koji raspolaže osposobljenim kadrovima za izvođenje tih radova.

Osim navedenih uslova izvođač kome se mogu ustupiti poslovi redovnog državanja cesta mora biti licenciran za tu vrstu poslova, u skladu sa važećim Pravilnikom o licenciranju.

Odredba iz stava 2. ovog člana se ne odnosi na nerazvrstane ceste.

## **V ZAŠTITA CESTA**

### **Član 23.**

Pod zaštitom cesta u smislu ove Odluke podrazumijeva se :

- zaštita ceste od prekomjernog opterećenja,
- sprečavanje rastinja koje svojim gabaritima ulaze u trup ceste ili cestovnog pojasa,
- zaštita od oštećenja trupa ceste,
- zaštita putnih, građevinskih objekata i opreme ceste,
- zaštita saobraćajne signalizacije,
- zaštita od gradnje objekata u cestovnom pojasu cesta,
- reguliranje postavljanja kablova, vodova i instalacija u trupu ceste u cestovnom i zaštitnom pojasu,
- sprečavanje deponovanja materijala na cesti i uz cestu,
- reguliranje postavljanja reklamnih znakova.

### **Član 24.**

Vozila sa gusjenicama, kao i druga vozila koja mogu oštetiti kolovoz mogu se kretati na lokalnim i nekategorisanim cestama i ulicama u naselju sa asfaltnim i betonskim kolovozima, samo ako su opremljeni sa odgovarajućim zaštitnim oblogama na gusjenicama.

## **Član 25.**

Zabranjeno je nanošenje blata i drugih prljavih materija na lokalne i nekategorisane ceste i ulice na području općine Gradačac.

## **Član 26.**

Zabranjeno je poduzimati bilo kakve radove ili radnje na javnoj cesti i cestovnom pojasu, ako bi ti radovi ili radnje mogli oštetiti javnu cestu i povećati troškove njenog održavanja, odnosno ometati i otežavati saobraćaj, a naročito je zabranjeno:

- \_ Ispuštati fekalije, fekalne vode i ostale vode iz objekata u vlasništvu pravnih i fizičkih lica na ulicu i cestu ili cestovni kanal,
- \_ Istresati u cestovne kanale materijal ili tekućine,
- \_ pranje tepiha i automobila na cesti,
- \_ po ulici ili cesti vući grede, balvane i druge predmete čime bi se mogla oštetiti cesta,
- \_ prosipati po ulici ili cesti maziva ili druge masne tvari,
- \_ ostavljati na cesti i u cestovnom pojasu pokvarena, oštećena i napuštena vozila,
- \_ građevinske materijale/gr građevinski šut, šljaku, otpadni materijal, betonske blokove i sl,
- \_ Iscrtavati i brisati horizontalne i vertikalne signalizacije te premještati, otuđivati i izmjenjivati vertikalnu signalizaciju i cestovnu opremu,
- \_ postavljati reklamne znakove uz ceste bez odobrenja nadležnog općinskog organa,
- \_ zatrpavati ili zatvarati kanale u cestovnom pojasu bez prethodno pribavljene saglasnosti od strane općinske službe nadležne za komunalne poslove.

## **Član 27.**

Postavljanje saobraćajnih znakova i saobraćajne opreme može se izvršiti samo na osnovu odobrenja izdatog od strane upravitelja javne ceste.

Saobraćajna signalizacija postavlja se na javnoj cesti na osnovu saobraćajnog projekta.

Za ceste koje su izgrađene do dana stupanja na snagu ove Odluke, a nemaju saobraćajni projekat, važeće je postojeće stanje saobraćajne signalizacije i opreme, do izrade saobraćajnog projekta.

Upravitelj ceste dužan je pravovremeno obavijestiti MUP o svim promjenama stanja na cestama koje bitno utiču na prohodnost cesta i sigurnost saobraćaja, kao i o poduzetim mjerama za nesmetano odvijanje saobraćaja.

## **Član 28.**

Za upotrebu i korišćenje javnih cesta propisuju se naknade za :

- vanredni prijevoz,
- postavljanje natpisa u cestovnom i zaštitnom pojasu ceste,
- korišćenje cestovnog zemljišta i pojasa uz javnu cestu za polaganje po osnovu položenih infrastrukturnih instalacija.

Visina naknada iz prethodnog stava će se utvrditi posebnom Odlukom koju priprema upravitelj, a usvaja Općinsko vijeće.

## **Član 29.**

Štetu koja je prouzrokovana na cestama i cestovnom pojasu od strane fizičkih i pravnih lica zapisnikom će ustanoviti saobraćajni inspektor ( u daljem tekstu: ovlašteni općinski inspektor), koji će proslijediti Komisiji za procjenu štete, formiranoj od strane Općinskog načelnika.

Ukoliko počinitelj ne isplati na vrijeme procijenjenu vrijednost štete, naplata će biti ostvarena putem tužbe kod nadležnog suda.

## **Član 30.**

Vanrednom prevozom, u smislu ove odluke, smatra se prijevoz vozilima koja prekoračuju dozvoljenu masu, osovinsko opterećenje ili dimenzije.

Učesnici u saobraćaju mogu vršiti vanredni prevoz samo na osnovu odobrenja izdatog od strane upravitelja ceste, kojim će se regulisati visina naknade za obavljenje vanrednog prevoza, te prava i obaveze prevoznika.

### **Član 31.**

Pravno lice ili javno preduzeće, kojem je ustupljeno pravo održavanja javnih cesta, oslobođeni su plaćanja naknada za vanredne prijevoze, u slučajevima kada svojim vozilima, isključivo za potrebe održavanja cesta, vrše vanredni prevoz.

### **Član 32.**

Vozilo koje vrši vanredni prijevoz bez odobrenja upravitelja ceste isključit će iz saobraćaja ovlašteni radnik PU Gradačac.

### **Član 33.**

Reklamni panoi, reklamne zastave, zastave sa natpisom, rampe, stubići i druge fizičke prepreke kojima se reklamiraju poslovni objekti, proizvodi, usluge i slično (u daljem tekstu natpisi i uređaji), mogu se postavljati pored javnih cesta na preglednom dijelu ceste, sa desne strane kolovoza, u pravcu vožnje, na odstojanju od najmanje 3 m od spoljne ivice kolovoza do lijeve spoljne ivice ploče natpisa.

Natpisi i uređaji ne smiju zaklanjati saobraćajni znak, odnosno umanjivati vidljivost saobraćajnog znaka, niti svojim izgledom, bojom, oblikom i tekstom biti slični nekom saobraćajnom znaku, radi bezbjednosti saobraćaja.

### **Član 34.**

Natpisi i uređaji se postavljaju na slobodno stojećim nosačima. Visina donje ivice ploče natpisa iznosi najmanje 2 metra, računajući od površine kolovoza ili površine koja je najviša na datom potezu.

Materijali od kojeg su izgrađeni natpisi i uređaji ne smiju reflektovati svjetlost koja ometa učesnike u saobraćaju.

### **Član 35.**

Odobrenje za postavljanje natpisa i uređaja (osim reklama i reklamnih panoa) u zaštitnom pojasu ceste izdaje upravitelj ceste.

Odobrenje iz prethodnog stava se izdaje za cijelu kalendarsku godinu, bez obzira na vrijeme korištenja u toku godine.

### **Član 36.**

Širina zaštitnog pojasa mjeri se od vanjskog ruba cestovnog pojasa tako da je u pravilu širok sa obje strane:

- za lokalne ceste 5 m,
- za nerazvrstane ceste i ulice 3 m.

U zaštitnom cestovnom pojasu ne mogu se graditi objekti kao što su stambene, poslovne, pomoćne i slične zgrade, bunari, rezervoari, septičke jame i slično, osim u slučaju gusto izgrađenih područja na kojima je već uspostavljen ulični niz (građevinska linija u odnosu na ulicu).

U pojasu iz prethodnog stava mogu se graditi:

- objekti cestovne i saobraćajne infrastrukture,
- kao i objekti ostalih infrastrukturnih instalacija /elektroinstalacije, TT, CATV, kanalizacione, vodovodne, plinske, toplovodne insatalacije i ostalo.

### **Član 37.**

Uvjete uređenja prostora i izgradnje objekata i instalacija na javnoj cesti i/ili u zaštitnom cestovnom pojasu utvrđuje upravitelj izdavanjem saglasnosti.

Saglasnost iz stava 1. ovog člana pribavlja općinska služba nadležna za poslove prostornog uređenja, kao prethodno pitanje, u postupku izdavanja urbanističke saglasnosti za građenje objekata i instalacija na javnoj cesti ili unutar cestovnog i zaštitnog pojasa.

Protiv upravnog akta iz stava 1. ovog člana može se podnijeti žalba Komisiji za statut i opće akte Općinskog vijeća Gradačac, u roku 15 dana od dana prijema akta.

Saglasnost upravitelja iz ovog člana će služiti i kao dokaz o pravu građenja, u postupku izdavanja odobrenja za građenje objekata/instalacija na javnoj cesti, pred nadležnom općinskom službom za prostorno uređenje.

Uvjete za uređenje prostora za izgradnju priključaka i prilaza javnoj cesti, sa radijusima skretanja od minimalno 4 m, utvrđuje općinska služba nadležna za poslove prostornog uređenja, u postupku izdavanja urbanističke saglasnosti za izgradnju/ rekonstrukciju objekata i ograda.

### **Član 38.**

Ograde i zasadi pored puta podižu se tako da ne ometaju preglednost ceste i ne ugrožavaju bezbjednost saobraćaja.

Vlasnici ili korisnici parcela koje se graniče sa javnim cestama dužni su da uredno održavaju zaštitni pojas ceste, da sijeku rastinje, čiste odvodne kanale.

Živa ograda se sacijeca na visini od 90 cm. Visoka stabla i rastinje se moraju potkresati na visini od 7,0 metara.

Naročito se zabranjuje zatvaranje bodljikavom žicom ograda koje su orjentisane prema putnoj strani, prevashodno u naseljenim područjima.

### **Član 39.**

Odredbе ove Odluke koje se odnose na zaštitu cesta odnose se i na površine izvan cestovnog zemljišta, koje imaju status javnog dobra, a u naravi iste ne služe toj svrsi ( razna proširenja, utvaji i sl.).

## **VI FINANSIRANJE CESTA**

### **Član 40.**

Sredstva za izgradnju, upravljanje, održavanje i zaštitu cesta obezbjeđuju se putem:

- Budžeta općine i viših nivoa vlasti;
- Naknade za postavljanje vodova i instalacija na cestama;
- Naknade za prekopavanje ceste;
- Naknade za postavljanje reklama i natpisa na cestama;
- Naknada za vanredni prijevoz;
- Ostalih prihoda ostvarenih posebnim propisom.

### **Član 41.**

Održavanje cesta vrši se u skladu sa raspoloživim finansijskim sredstvima predviđenim Programom i godišnjim planom održavanja, zaštite, rekonstrukcije i izgradnje lokalnih cesta i ulica u naselju koji godišnje donosi Općinsko vijeće.

## **VII INSPEKCIJSKI NADZOR**

### **Član 42.**

Nadzor nad izvršenjem odredbi ove Odluke i propisa koji se odnose na održavanje, zaštitu, izgradnju i rekonstrukciju cesta, vrši ovlašteni općinski inspektor i PU Gradačac.

Počinitelj prekršaja je dužan u zadanom roku za izvršenje, obaviti sve radnje naložene



rješenjem inspektora.

Ako počinioc prekršaja u određenom roku ne izvrši rješenje doneseno u prvostepenom postupku, inspektor donosi zaključak o izvršenju rješenja prisilnim izvršenjem angažiranjem drugog lica odabranog u skladu sa odredbama Zakona o javnim nabavkama, odnosno drugog izvođača, na trošak počinioca, sa predloženim načinom izvršenja.

Općinska služba za komunalne poslove osigurat će materijalna sredstva za prisilno izvršenje, s tim što će troškove potraživati od počinioca direktno ili putem lica iz prethodnog stava ovog člana, ukoliko stranka odbije snositi troškove izvršenja.

Organi unutarnjih poslova dužni su organu nadležnom za provođenje izvršenja pružiti pomoć u provođenju izvršenja.

### **Član 43.**

Inspektor iz prethodnog člana ove Odluke, vršeći inspekcijski nadzor cesta ima sljedeća prava i dužnosti:

A) pregledati:

1. stanje cesta,
2. radove na izgradnji, rekonstrukciji, sanaciji, održavanju i zaštiti javnih cesta,
3. ispunjavanje uvjeta za obavljanje redovnih radova održavanja na javnoj cesti,
4. radove koji se obavljaju na cesti u zaštitnom i cestovnom pojasu javnih cesta,
5. tehničku dokumentaciju u vezi sa radovima iz tačke 2. i 3. ovog člana (dozvole, saglasnosti, projekti, stanadi),
6. obavljanje upravnih i stručno-tehničkih poslova na javnim cestama,
7. planove, programe, ugovore i ostalu dokumentaciju koja se odnosi na održavanje i zaštitu javnih cesta,
8. provođenje mjera za osiguranje javnih cesta i saobraćaja na njima,
9. provođenje propisanih uvjeta za obavljanje zahvata u cestovnom i zaštitnom pojasu cesta;

B) vršeći inspekcijski nadzor inspektor ima pravo:

1. pregledati prostore, objekte, uređaje, materijale i dokumentaciju izvodaca na gradnji, rekonstrukciji i održavanju cesta,
2. saslušati stranke i svjedoke primjenom pravila upravnog postupka,
3. pregledati isprave kojima se može utvrditi identitet lica koja učestvuju u saobraćaju,
4. uzeti uzorke materijala te obavljati druge postupke, u skladu sa namjenom inspekcijskog nadzora
5. dobiti lične podatke o pravnim i fizičkim licima, podatke o vlasništvu vozila, podatke o vlasništvu zemljišta i objekata u zaštitnom pojasu ceste, kao i druge podatke potrebne za vođenje postupka u vezi sa kršenjem ove Odluke;

C) narediti:

1. obustavu radova koji se izvode na javnim cestama, u cestovnom ili zaštitnom pojasu ceste, suprotno odredbama ove Odluke, tehničkim propisima, standardima i normativima, te dati rok za otklanjanje nedostataka,
2. otklanjanje nedostataka na javnim cestama koji ugrožavaju sigurnost saobraćaja na njima,
3. privremenu zabranu odvijanja saobraćaja na javnim cestama ili njihovom dijelu, ako utvrdi da se na njima ne može sigurno odvijati saobraćaj, te narediti da se odmah poduzmu mjere za osiguranje i ponovnu uspostavu režima saobraćaja,
4. obustavu saobraćaja cestovnim motornim vozilima koja zbog svojih tehničkih svojstava ili načina na koji saobraćaju mogu nanijeti štetu javnoj cesti ili njenom dijelu i kada je njihov saobraćaj na cesti u suprotnosti sa zakonom i drugim propisima,
5. isključenje cestovnog motornog vozila iz saobraćaja na javnoj cesti kada utvrdi da dimenzije i ukupna masa ili njegovo osovinsko opterećenje prelazi veličine propisane Zakonom, a prijevoznik nema odgovarajuću dozvolu za vanredni prijevoz,
6. privremenu zabranu saobraćaja na novoizgrađenoj i rekonstruiranoj cesti, njenom dijelu ili objektu na njoj, ako utvrdi da, sa stajališta sigurnosti saobraćaja, ne ispunjava tehničke uvjete,

7. rušenje reklamnih znakova u cestovnom i zaštitnom pojasu postavljenih bez odobrenja ili suprotno uvjetima nadležnog federalnog i kantonalnog organa,
8. zabranu upotrebe priključnih putova koji su izgrađeni ili se grade suprotno odredbama Zakona,
9. u nužnim slučajevima, kada bi bila ugrožena sigurnost saobraćaja na javnoj cesti ili bi mogla nastati šteta na njoj, odrediti privremene mjere kako bi se otklonila opasnost ili spriječila šteta,
10. da se u polju preglednosti otklone nedostaci i nepravilnosti prouzrokovane kršenjem propisanih mjera za osiguranje preglednosti javne ceste,
11. da ovlašteni inspektori poduzmu i druge mjere u skladu sa ovom Odlukom, Zakonom i drugim propisima donesenim na osnovu Zakona.

D) U predmetima iz stava 1. tačka C) alineja 8. ovog člana, kada je zbog neposredne ugroženosti javne ceste ili sigurnosti saobraćaja na njoj ugrožena sigurnost učesnika u saobraćaju, inspektor može, po skraćenom postupku, bez saslušanja stranaka donijeti rješenje.

U slučaju iz prethodnog stava žalba na rješenje ne odlaže izvršenje.

U hitnim slučajevima inspektor može donijeti usmeno rješenje, sa rokom izvršenja odmah po izricanju.

E) Inspektori su dužni, bez odlaganja, podnijeti zahtjev za pokretanje prekršajnog postupka, ako u vršenju inspekcije utvrde da je počinjen prekršaj odredaba iz ove Odluke.

#### **Član 44.**

Pravna i fizička lica kod kojih se vrši inspekcijski nadzor dužna su omogućiti rad inspektorima, pružiti potrebnu pomoć i na njihovo traženje u određenom roku dostaviti podatke i dokumentaciju za vršenje inspekcijskog nadzora u smislu ove Odluke.

#### **Član 45.**

U vršenju poslova inspekcijskog nadzora općinski inspektor ovlašten je da donosi rješenja i zaključke, protiv kojih je dozvoljeno izjaviti žalbu Komisiji za statut i opća akta Općinskog vijeća Gradačac, u roku 15 dana od dana prijema istih.

O utvrđenim nalazima i preduzetim mjerama inspektor je dužan bez odlaganja obavijestiti nadležni općinski organ, javno preduzeće/ pravno lice zaduženo za održavanje cesta, a po potrebi policijsku upravu, učesnike u saobraćaju putem javnog informisanja i druge zainteresovane subjekte.

Ukoliko investitor ili izvođač radova ne otklone nedostatke u datom roku, inspektor će otklanjanje nedostataka naložiti organizaciji koja održava ceste ili nadležnom organu o trošku onog ko nije otklonio nedostatke.

#### **Član 46.**

Žalba protiv rješenja inspektora ne odlaže izvršenje rješenja u slučajevima kada se radi o neposrednoj opasnosti po život i zdravlje ljudi ili imovine, i bezbjednosti saobraćaja, i mogućnost normalne prohodnosti.

### **VIII KAZNE NE ODREDBE**

#### **Član 47.**

Novčanom kaznom od 500,00-5.000,00 KM kaznit će se pravno lice, a u iznosu od 200,00-1.000,00 KM odgovorno lice u pravnom licu za prekršaje u sljedećim slučajevima:

1. Ako saobraća na lokalnim i nekategorisanim cestama i ulicama u naselju na asfaltnim i betonskim kolovozima vozilima bez pumpanih guma ili vozilima sa gusjenicama bez propisanih obloga (član 24.),
2. Ako u slučaju nanošenja blata i drugih prljavih materija na lokalne i nekategorisane ceste, te ulice u naselju ne očiste te nanose (član 25),
3. Ako postupaju suprotno članu 26. ove Odluke,

4. Ako vrše vanredni prijevoz bez rješenja o dozvoli za vanredni prijevoz (član 30.),
5. Ako postavlja natpise pored ceste suprotno o načinu postavljanja (član 33,34.),
6. Ako postavlja natpise pored ceste bez odobrenja nadležnog organa (član 35.),
7. Ako u putnom pojasu gradi objekte za koje nema saglasnost upravitelja iz člana 37. ove Odluke,
8. Ako u zaštitnom pojasu lokalne i nekategorisane ceste (član 38.), kao i na površinama iz člana 39. ove Odluke, postavlja ograde i zasade, deponuje građevinski materijal, parkira vozila i sl, suprotno odredbama ove Odluke,
9. Ako ne postupi po nalogu iz rješenja inspektora (član 42.).

#### **Član 48.**

Novčanom kaznom u iznosu od 200,00-1.000,00 KM kaznit će se fizičko lice:

1. Ako saobraća na lokalnim i nekategorisanim cestama i ulicama u naselju na asfaltnim i betonskim kolovozima vozilima bez pumpanih guma ili vozilima sa gusjenicama bez propisanih obloga (član 24.),
2. Ako u slučaju nanošenja blata i drugih prljavih materija na lokalne i nekategorisane ceste, te ulice u naselju ne očiste te nanose (član 25),
3. Ako postupaju suprotno članu 26. ove Odluke,
4. Ako vrše vanredni prijevoz bez rješenja o dozvoli za vanredni prijevoz (član 30.),
5. Ako postavlja natpise pored ceste suprotno o načinu postavljanja (član 33,34.),
6. Ako postavlja natpise pored ceste bez odobrenja nadležnog organa (član 35.),
7. Ako u putnom pojasu gradi objekte za koje nema saglasnost upravitelja iz člana 37. ove Odluke,
8. Ako u zaštitnom pojasu lokalne i nekategorisane ceste (član 38.), kao i na površinama iz člana 39. ove Odluke, postavlja ograde i zasade, deponuje građevinski materijal, parkira vozila i sl, suprotno odredbama ove Odluke,
9. Ako ne postupi po nalogu iz rješenja inspektora (član 42.).

### **IX PRELAZNE I ZAVRŠNE ODREDBE**

#### **Član 49.**

Obavezuje se Općinska služba nadležna za komunalne poslove da u roku 3 mjeseca od dana stupanja na snagu ove Odluke, nadležnom ministarstvu TK dostavi prijedlog/spisak ulica na području općine Gradačac, kako bi vlada TK donijela izmjenu / dopunu Odluke o kategorizaciji lokalnih cesta i ulica u gradu Tuzla i općinama Tuzlanskog kantona (Službene novine Tuzlanskog kantona br. 14/14) čime bi važeću odluku dopunila nazivima ulica na području općine Gradačac.

#### **Član 50.**

Obavezuje se Općinska služba nadležna za komunalne poslove da u roku 3 mjeseca od dana stupanja na snagu ove Odluke uspostavi Registar iz člana 6. ove Odluke.

#### **Član 51.**

Općinsko vijeće će u roku 3 mjeseca od dana stupanja na snagu ove Odluke, donijeti Odluku o visinama naknada iz članova 28., 30. i čl. 35. ove Odluke.

#### **Član 52.**

Sredstva ostvarena po osnovu primjene ove Odluke prihod su općine Gradačac.

#### **Član 53.**

Danom stupanja na snagu ove Odluke prestaje da važi Odluka o nekategorisanim cestama na području općine Gradačac ("Službeni glasnik općine Gradačac", br. 1/2006).

## Član 54.

Ova Odluka stupa na snagu osmog dana od dana objavljivanja u “Službenom glasniku općine Gradačac”.

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINA GRADAČAC  
-Općinsko vijeće -

Broj: \_\_\_\_\_  
Gradačac, \_\_\_\_\_ 2017. godine

PREDSJEDAVAJUĆI  
OPĆINSKOG VIJEĆA

\_\_\_\_\_  
Šakić Enir, s.r.

**O B R A Z L O Ž E N J E**  
**prijedloga Odluke o lokalnim i nekategorisanim cestama**  
**i ulicama na području općine Gradačac**

Članom 13. stav 4. Zakona o cestama Federacije BiH ("Službene novine Federacije Bosne i Hercegovine", broj: 12/10, 16/10 i 66/13) propisano je da upravljanje, građenje, rekonstrukciju, održavanje i zaštitu lokalnih cesta i gradskih ulica vrše nadležni općinski organi. Članom 4. stav 2. istog Zakona propisano je da se izgradnja, korištenje, održavanje, zaštita i rekonstrukcija nerazvrstanih cesta, kao i poslovi nadzora nad tim cestama uređuju općinskim propisom, u skladu sa ovim Zakonom.

Obzirom da su navedenim zakonskim propisom taksativno navedene radnje / djelatnosti koje je potrebno regulisati u vidu vršenja nadležnosti nad javnim cestama, u konkretnom slučaju lokalnih, nerazvrstanih cesta i ulica, Odluka se sastoji iz devet dijelova: I – opće odredbe, II- upravljanje, III- izgradnja i rekonstrukcija, IV- održavanje, V- zaštita cesta, VI- finansiranje cesta, VII -inspekcijski nadzor, VIII-kaznene odredbe i IX- prelazne i završne odredbe.

U općim odredbama ove Odluke navedeno je da su Odlukom o kategorizaciji lokalnih cesta i ulica u gradu Tuzla i općinama Tuzlanskog kantona (Službene novine Tuzlanskog kantona br. 14/14) taksativno navedene lokalne ceste na području općine Gradačac, iz razloga što je za razvrstavanje istih nadležna vlada TK. U nadležnosti općine Gradačac je upravljanje istim. U ostalim dijelovima Odluke utvrđena su prava i obaveze koja se odnose na samo upravljanje, izgradnju, zaštitu, finansiranje, nadzor, ali i kaznene odredbe, u slučaju kršenja odredaba iste.

Obzirom da Općina Gradačac nije dostavila spisak ulica sa područja svoje općine, u prelaznim i završnim odredbama utvrđena je obaveza Općinskoj službi nadležnoj za komunalne poslove da u roku 3 mjeseca od dana stupanja na snagu ove Odluke, nadležnom ministarstvu TK dostavi prijedlog/spisak ulica na području općine Gradačac, kako bi vlada TK donijela izmjenу / dopunu Odluke o kategorizaciji lokalnih cesta i ulica u gradu Tuzla i općinama Tuzlanskog kantona (Službene novine Tuzlanskog kantona br. 14/14), čime bi važeću odluku dopunila nazivima ulica na području općine Gradačac. Takođe je utvrđena obaveza Općinskom vijeću da u roku 3 mjeseca od dana stupanja na snagu ove Odluke, donese Odluku o visinama naknada iz članova 28., 30. i čl. 35. ove Odluke.

Shodno navedenom, urađen je nacrt Odluke o lokalnim i nekategorisanim cestama i ulicama na području općine Gradačac, koji je usvojen na četvrtoj redovnoj sjednici Općinskog vijeća Gradačac (30.03.2017.godine), kao dobra osnova za izradu prijedloga Odluke. Usvajanjem navedenog nacrta, Općinsko vijeće je donijelo zaključak br.01-05-99/17 od 30.03.2017. godine, kojim je ustanovljena obaveza općinskoj Službi nadležnoj za komunalne poslove, da provede javnu raspravu po usvojenom nacrtu.

Postupajući po navedenom zaključku Služba je zakazala održavanje Javne rasprave na dan 25.05.2017. godine u 17.00 h, u prostorijama Sale za sjednice Općinskog vijeća Gradačac. U pozivu za održavanje rasprave navedeno je da se primjedbe / sugestije po pitanju predmetne Odluke, u periodu od dana objavljivanja poziva do 25.05.2017. godine, dostave u pisanoj formi Općinskoj službi za urbanizam, investicije i komunalne poslove Gradačac, Odsjek za komunalne poslove. Na zakazanoj raspravi nije se pojavilo niti jedno lice od strane građanstva, o čemu je sačinjen Zapisnik. U ostavljenom periodu za dostavljanje primjedbi Službi nije stigla niti jedna primjedba/sugestija.

Prilikom izrade Prijedloga Odluke, Služba je uvažila i prijedloge/sugestije iznesene na sjednici Općinskog vijeća od 30.03.2017. godine, koje se odnose na navođenje nerazvrstanih cesta na općini i zahtjeve da se utvrde i druge ceste koje nisu navedene u tabeli sa odgovarajućim podacima (dužina, širina i dr.). Obzirom da su nerazvrstane ceste u posebnoj kategoriji (nisu kategorisane) i da iste treba održavati/ graditi prema potrebama lokalnog stanovništva, u prijedlogu Odluke izostavljena je tabela i predviđeno da se vodi poseban registar ovih cesta, te da se isti dopunjava/ odnosno mijenja prema stvarnom stanju na području općine.

Prije izrade konačnog prijedloga predmetne Odluke, obrađivaču iste dostavljen je akt od strane Općinskog pravobranilaštva br. M-109/2017 od 16.10.2017.godine u kojem su navedeni prijedlozi, koje po mišljenju istog treba uvrstiti u prijedlog Odluke. Shodno navedenom, Radna grupa uključena u izradu predmetne Odluke izvršila je izmjenu/ispravku pojedinih odredaba/članova, u odnosu na nacrt Odluke.

Nakon što su preduzete neophodne aktivnosti po zaduženju iz zaključka br.01-05-99/17 od 30.03.2017. godine, urađen je prijedlog Odluke u datom tekstu.

**OBRAĐIVAČ**

Općinska služba za urbanizam,  
investicije i komunalne poslove

**PREDLAGAČ**

mr.sci. Edis Dervišagić, Općinski načelnik